

# PAOT TE HĀPXEXKA GANAX YŌG TIKMŪ'ŪN PU TAPPET KAX'ĀMI'

Tute' kuxa mām ka'ok xop pu 'āneo

**1** <sup>1</sup>Ūgmūn Paot. 'Āte xa kax'āmi nūhū tappet. Yeyox Kunnix tek yāykutnāhā', xix Topa tek yāykutnāhā'. 'A tikmū'ūn tek nūnnā'ah. Pa Yeyox Kunnix te nūgkutnāhā', xix yūmūg 'Ātak Topa te!. Yā nōm te Yeyox Kunnix putpu' hīnnāhā'. <sup>2</sup>Nūnte ti yūmūg xape xop. Yā' xohix te xa 'āneo hōm, xix hāpxexka Ganax yōg kuxa mām ka'ok xop xohix pu 'āneo hōm.

<sup>3</sup>Pūyā yūmū yōg 'Ātak Topa xa hāmmaxnā', xix yūmūg xuxyā Yeyox Kunnix xa hāmmaxnā', xix 'ākuxa mām mā.

<sup>4</sup>Yūmūg xuxyā Yeyox Kunnix te yāy mūn hōm, nūy yūmūg pupi tu' xok, yūmū'āte hāpkummuk mīy hah. 'Ūxok, nūy yūmūg mōy hām xexka kummuk kopah. Yā yūmū yōg 'Ātak Topa tep-tup. <sup>5</sup>'Āpu yūmūg xohix te Topa max xe'ēgnāg 'āktux mō'kumak mōg, tu' xuktux kux 'ohnāg. Hamūn.

Yā hām'āpak max puxehnāg Topa yōg

<sup>6</sup>'Āy! 'Āxop texīy tu Topa nīm mō'ka'ok. Tute 'āxop xānāhā', puyīy Kunnix xa hāmmaxnā'. Pa 'āxop te hām'āpak max nōy 'āpak nōmhā'. Yā hām'āpak'ax puknōg, 'ap Topa yōg'ah. <sup>7</sup>'Ap xe'e'ah. Nōm xop te 'āxop kummugāhā', tu' xak, nūy Kunnix yōg hām'āpak max'ax nōy yānān, pu tu' yāyhā hitop. <sup>8</sup>Pax 'ūgmūg xa hām'āpak max nōy 'āktux, puxix Topa 'ūgkummugā', nūy pago. Pax pu pexkox yōg nū'pok xop nūn pexkox tu', tu xa hām'āpak max nōy 'āktux, puxix Topa 'ūkummugā', nūy pago. Hamūn. Hōmā 'āte xa hām'āpak max'ax 'āktux, <sup>9</sup>'ūgmū'āte hām'āktux tap, tu hōnhā nōm 'āktux 'ūxeheh. Tik 'ūm te hām'āpak max'ax puknōg 'āktux, pūyā Topa nōm kummugā', nūy tu pago. Yā nōm hām'āpak max puknōg. <sup>10</sup>Piyā 'āte' xak nōmhā'? 'Ok pe tikmū'ūn te yōg hāpxopmā'ax putup? 'Ok pe Topa te yōg hāpxopmā'ax putup? Yā Topah, 'a tikmū'ūn'ah. Pax 'ūg xak, puyīy tikmū'ūn yōg hāpxopmā'ax putup, kopxik mūn hām hok Topa tu!. Yā tikmū'ūn tuk hām'ax. Pa Topa mūn puk hām xe'ēgnāg.

### Texiy Topa te Paot mō'kutnāhā'

<sup>11</sup>Ūxape xop, 'āte 'āp-tup, xayīy hāmyūmmūg. 'Āte hām'āpak max'ax 'āktux, 'a tikmū'ūn tek xat'ah, 'āte nōm hām'āpak max'ax 'āktux. <sup>12</sup>'A tikmū'ūn te 'ā hāmyūmmūgā'ah, tu 'ā' xuktux'ah, pa Yeyox Kunnix te'.

<sup>13</sup>Ha ta 'āxop te yūmū yōg hāpxopmā'ax yūmmūg tap. Hōmā 'āte Yoneo xop yōg hāpxopmā'ax tat, tu Kunnix kopa' kuxa mām xop kute'ex kummuk pax, tu' xak, nūy nōm pu hāpkummugā', puyīy nōm xop yāy xatat, tu yāy nōā'. <sup>14</sup>Hak xexka nōynāg mōg Yoneo xop kopah, yā Yoneo xop mōnāyxop yōg hāpxopmā'ax xohix tat 'āte!. Yā' xat'ax xohix 'āte' mīy māynāg, tu' xat'ax 'ūm xaxok 'ohnāg.

<sup>15</sup>Hōmā 'ūktut tek put xet'ah, 'ihā Topa 'ā yāy kutnāhā', tuk xānāhā', nūy mōgkutnā'. Yā Topa te 'ā hāmmaxnāhā', <sup>16</sup>tu 'ā' mūg yāy kutok pit, 'ūyīy hām'āpak max'ax 'āktux Yoneo xop hā' puknōg xop pu'. 'Āte tikmū'ūn 'ūm yīkopit 'ohnāg. Nōm te tuk mūn yūmmūgā 'ohnāg. <sup>17</sup>'Ak mōg' ah kōmēn Yenoyanēn tu', tu hām'āktux 'ohnāg Yeyox yōg mō'pok xop mūtik. Yā Yeyox te nōm mō'pok hāmāxap, tuk-nāy tuk mūn mōgkutnāhā. Ha tak mōg 'Anap tu', tu mōktuk xupep. Hāpxip 'ihāg nūn putpu kōmēn Namēn tu', tu nūktuk xupep. <sup>18</sup>Hāmyāxatamuk tikoyuk nōg, ha tak mōg Yenoyanēn tu', nūy nox xip Pet pet tu', nūy hām'āktux, tu noxk xip 'amniy te 15 hā. <sup>19</sup>Hamūn, 'āte pēnāhā Pet xix Tiak, yā yūmūg xuxyā yāy taknōy, pa mō'pok xop nōy 'a' pēnā'ah.

<sup>20</sup>'Āte kax'āmi nūhū tappet, tu hāpxe'e kax'āmi', tu' koit 'ohnāg. Topa keppa 'āte' xuktux.

<sup>21</sup>Hāpxip 'ihā tak mōg hāpxexka Xit tu', xix hāpxexka Xinix tu', <sup>22</sup>ha hāpxexka Yonex yōg kuxa mām ka'ok xop tek yūmmūg 'ohnāg, <sup>23</sup>pāyā hām'āpak, hu: "Hōmā Paot tek mūg kummugāhā', pa hōnhā Topa yōg hām'āpak max'ax 'āktux. Hōmā tutep-tup, nūy Topa yōg putat max koxyōy, pa hōnhā Topa yōg hāpxopmā'ax 'āktux," kaxīy. <sup>24</sup>Tu' kuxa hittup 'ūgmūn hā, tu Topa 'āktux max.

### Paot xix Yeyox yōg mō'pok xop

**2** <sup>1</sup>Hāmyāxatamuk te 14 nōg, ha ta xek mōg kōmēn Yenoyanēn tu', Maname mūtik mōg, tu Tit mōgāhā', <sup>2</sup>Yā Topa te 'ā' pēhāhā', tu 'ā' xuktux, tuk xat, 'ūmōg Yenoyanān tu', hu tak mōg, tu mōktuk xupep, tu' pēnā max'ax xexka xop mūtik hām'āktux, 'ap nōy xop mūtik hām'āktux'ah. 'Āte nōm hāmyūmmūgāhā hām'āpak max'ax, 'āte nōm 'āktux hāmpuknōg xop pu', nōm xop te Yoneo xop hā' puknōg, puyī xexka xop 'ūghām'ax 'āktux max. <sup>3</sup>Ha Tit mūn xip 'ūgmūtik, tu hāpxexka Genex yōg tihik, yā Yoneo xop hā' puknōg, pa tik xop tek xat 'ohnāg, pu Tit yāy xax xax 'ūyīmap. 'Āmhok. <sup>4</sup>Pa' nūn mō'āmā'ax xop, 'ap Kunnix kopa' kuxa mām'ah, yā xetxox hex putuk, tu' nūn, tu nūktu yūmū yōg xop kopa' mōxahā', nūy yūmū yōg hāpxopmā'ax max pēnā'. Yā yūmū yōg hāpxop xak'ax 'ap-tux'ah, yā yūmūg kuxap-xet Yeyox Kunnix kuxa mūtik. Pa nōm mō'āmā'ax xop tek putup, nūy yūmūg mōgā putat kummuk hā, nūy

yūmūg kuxa hīy, 'ūyīy hittup hok. Yā nōm te! xat pax nām. Yā 'ūyōg hāpxop xak'ax putux. <sup>5</sup>Ha tak mū'āte nōm komut xop 'āpak 'ohnāg. Hamūn, nōm 'āpak 'ohnāg hok'ah, xayīy 'āxop pip ka'ok Topa yōg hām'āpak max tu!.

<sup>6</sup>Ha ta' xexka xop, yā tikmū'ūn te nōm pe'paxex xexka!. ('Ok xexka! pek-tōgnāg? Yā' nōy putuk. Topa te tikmū'ūn yōg hāpxopmā'ax xohix kopit, tu' xax max hā' kopit 'ohnāg, pāyā' kuxa kopa' pēnāhā!.) Nōm xexka xop tehomī 'ā hāmyūmmūgāhā hām 'ohnāg, <sup>7</sup>pa nōm xop tek yūmmūg, Topa te mōgkutnāhā 'ūgmūn, 'ūyīy Topa yōg hām'āpak max'ax 'āktux Yoneo xop hā' puknōg xop pu!, pa Topa te mō Pet kutnāhā Yoneo xop hah. Ha nōm xexka xop te! yūmmūg. <sup>8</sup>Topa tek ka'ogāhā, tu nūgkutnāhā, 'ūmōg Yoneo hā' puknōg xop hah, ha ta Topa te Pet ka'ogāhā, tu mō'kutnāhā, pu Yoneo xop ha mōg. <sup>9</sup>Topa te 'ā hāmmaxnāhā, ha Tiak te! yūmmūg, xix Pet te!, xix Yoām te!. Yā' pēnā max'ax xexka xop tek yīm nuhuk, xix Maname yīm nuhuk, yāk mūg xohix xape xe'!. 'Ūgmū'āte yāy mūtīk hām'āktux, tu' xuktux, 'ūmax 'ūgmūg hām Yoneo hā' puknōg xop kopah, ha ta' nōm hām Yoneo xop kopah. <sup>10</sup>Pa nōm tek mū'ā' xak, pu hāpxop popmā pax 'ūhok xop pu!. Hamūn. 'ātep-tup xexka!, nūy hāpxop popmā pax.

### Pet xix Yoneo hā' puknōg xop

<sup>11</sup>Hōmā ha ta' nūn Pet, kōmēn 'Ātīkit tu' nūn, ha 'āte tikmū'ūn keppa hām'āktux, hu: "Pet, xate hāpkummuk mīy." Kaxīy. <sup>12</sup>Hamūn. Pet xit hāmpuknōg xop mūtīk, yā' kuxa mām ka'ok xop, ha ta Tiak te nū'kutnāhā tīhik, ha nōm nūn tu nūktu! mōxaha!, ha Pet te' puknōg xop nīm mō'ka'ok. 'Ap putup'ah, puyīy nūmūtīk tu xit, Yoneo xop yīpkutuk tu!. <sup>13</sup>Ha ta' pip kama 'Ātīkit yōg Yoneo xop, yā yūmūg xape xop, tu nōm te Pet yōg hāpxopmā'ax tat, tu' yīpkutuk kamah. Hamūn, Maname kama te Pet pe' mōg, tu Pet yōg hāpxopmā'ax tat kamah. <sup>14</sup>'Āte' pēnāhā!, 'ap hāmyok mīy'ah, 'ap hām'āpak max'ax xe'e'ah. 'Āte Pet pu hām'āktux, 'ūxohix keppa' xuktux, hu: "Āmūn yā Yoneo, pa 'a xate mōnāy xop yōg hāpxopmā'ax tat'ah. Texīy xate' xat, pu Yoneo hā' puknōg xop nōm hāpxopmā'ax tat?" Kaxīy.

### 'Ūxohix kuxa mām Yeyox kopah, yīy Topa te' kuxa kummuk tupmāhā'

<sup>15</sup>'Ūgmūg mūn yā Yoneo xop kopak pip. 'Ūgmūg tak yā Yoneo, xik mūg tut, yā Yoneo xe'e!, 'a' puknōg kummuk xop yōg'ah, <sup>16</sup>pak mū'āte hāmyūmmūg: Tikmū'ūn kuxa ka'ok Yeyox Kunnix kopah, yīy Topa te' kuxa kummuk tupmāhā!, puyīy kuxa tu max. Pa tikmū'ūn nōy te Topa yōg xat'ax 'āpak, tu' mīy. 'Ok hā kaxīy yāy kuxa tupmā Topa keppa nō'ōm? 'Āmhok. 'Ap kaxīy'ah. Yūmūg mūn kama kuxa mām ka'ok Yeyox Kunnix kopah, pu Topa yūmūg kuxa kummuk tupmā. Yā hā kaxīy Kunnix kopa yūmūg kuxa mām ka'ok. Mōyyex xat'ax 'ūm te yūmūg kuxa tupmā hok. Tep te Topa yōg xat'ax mīy, puyīy Topa tikmū'ūn kuxa kummuk tupmā, puyī' kuxa tu max? Yā tikmū'ūn 'ohnāg. <sup>17</sup>Pa yūmūg kuxa mām ka'ok Kunnix kopah, nūy yūmūg kuxa tu max, pa hāpkummuk mīy. 'Ok Kunnix te hāpkummuk mīy'ax nōynā' mōgahā? 'Āmhok. <sup>18</sup>Hōmā 'āte hāpkummuk mīy kux. Pax xe' mīy, kopxix 'ūgkummuk, yā 'āte Topa yōg xat'ax koxyōy. <sup>19</sup>'Ūgkummuk, ha

Topa yög xat'ax te' xat, puk putex, pa Kunnix tek pupi' xok, yiy Möyyex yög xat'ax tek xat hok. Hã kaxiy 'ügmgõg Topa peheh, tu Topa yökãmüg mög. <sup>20</sup>Hõmã Kunnix tek pupi' xok mĩpkupnix tu', ha Topa te' putpu' hĩnnãhã. Hõnhã 'ak puxet'ah, pa Kunnix xip 'ügkopah. Hõnhã Kunnix mütik 'ügkuxa hi xe'ëgnãg. Yãg kuxa yũm ka'ok Topak-tok pit kopah. Tute mög yãg xe'ëgnãg, tuk pupi' xok. <sup>21</sup>Topah, 'ãmax, tu 'ã' hok hã hãmmãxnãhã, yig kuxa hi xe'ëgnãg. Paxpu Möyyex yög xat'ax tikmũ'ũn kuxa kummuk maxnã', puxix Kunnix tu' hok hã' xok. Pa Topa te' hok hã' hõm. Yã yũmüg pupi' xok Yeyox, tu yũmüg kuxa kummuk tupmãhã.

### Hã texiy Topa te' kuxa kummuk tupmãhã'

**3** <sup>1</sup>Hãpxexka Ganax yög tikmũ'ũn, yã 'ãxop putox ka'ok, tu hãmyũmmüg 'ohnãg. Tikmũ'ũn te 'ãxop hitop mögãhã hatoh'ah, hãm'ãktux kummuk hã 'ãmögãhã. Hõmãg mũ'ãte 'ãxop xohix pu hãm'ãktux xe'e', Yeyox Kunnix xok mĩpkupnix tu', ha xate' yũmmüg, tu 'ãkuxa hã' pãnãhã. Pa tikmũ'ũn te 'ãxop mögãhã hatoh'ah. <sup>2</sup>Ãpu hãm'ãktux puxet. 'Ok 'ãxop te Möyyex yög xat'ax xohix mĩy, pu Topa yãg Koxuk nũ'kutnã 'ã hah? 'Ãmhok. 'A kaxiy'ah. 'Ok 'ãxop te Topa yög hãm'ãpak max'ax 'ãpak, tu 'ãkuxa mãm ka'ok, puyiy Topa Koxuk 'ãkopa' xihip? Yã hamũn. <sup>3</sup>Ãxop texiy 'ãhitop xexka'? 'Ãmög kõnãmãhã Topa Koxuk mütik, puyiy 'ãka'ogã', pa hõnhã xatep-tup, nüy 'ãp-xet hã mög, nüy yãg ka'ogã', nüy 'ãp-xet hã hãpxopmã'. Teptu 'ãxop te' ka'ax hã yãp-xehnãg mög Topa yög putat hã? <sup>4</sup>'Ok 'ãxop te hitop hã xüy hã tot? Püyã hitop hok! <sup>5</sup>'Ok 'ãxop te Möyyex yög xat'ax mĩy, yiy ta Topa te xa nũ'kutnã yãg Koxuk, tu 'ãxop kopa hãpxopmã ka'ok xe'ëgnãg? 'Ãmhok. Pa 'ãxop te Topa yög hãm'ãpak max'ax 'ãpak, tu 'ãkuxa mãm ka'ok, yiy ta Topa te xa mõ'kutnãhã yãg Koxuk, ha 'ãxop kopa hãpxopmã max xe'ëgnãg. Hamũn. Yã kaxiy!

<sup>6</sup>Ãpu 'Amanãm pe'ãpaxeh. Topa yög tappet te: "Amanãm kuxa yũm ka'ok Topa kopah, yiy Topa te' kuxa tupmãhã', pu kuxa tu max. Yã Topa te 'Amanãm yög hãpkummuk mĩy'ax xaxogãhã', pu tu kux." Kaxiy. Hã kaxiy yũmüg kuxa mãm ka'ok, yiy Topa te yãg Koxuk yũmũ'ã nũ'kutnãhã'. <sup>7</sup>Yã 'ãxop te hãmyũmmüg: Yã 'Amanãm hã' mõkputox xe'e', yã 'ãkuxa mãm ka'ok kamah. <sup>8</sup>Hõmã Topa yög tappet te yũmũ'ã hãmyũmmügãhã', hu: "Hãpxip 'ihã Yoneo hã' puknõg xop kuxa mãm ka'ok putup Yeyox Kunnix kopah, yiy Topa te' kuxa kummuk tupmãp-tup, puyi' kuxa tu max." Kaxiy. Tu xe 'Amanãm pu hãm'ãpak max'ax 'ãktux, hu: "Topa te 'ãmũn hã hãmmãxnãp-tup, yã' hep xop xohix ha hãmmãxnãp-tup, xexka xohix tu' hãmmãxnãp-tup," kaxiy. <sup>9</sup>Ha ta 'Amanãm kuxa yũm ka'ok, yiy ta Topa te 'Amanãm hã hãmmãxnãhã', tu' kuxa mãm ka'ok xop xohix ha hãmmãxnãhã', yã 'Amanãm putuk.

<sup>10</sup>Tikmũ'ũn 'um kuxa yũm ka'ok Möyyex yög xat'ax kopah, pu tu' kuxa maxnã Topa pu'. Pa Topa yög xat'ax te hãpkummuk mĩy'ax 'ãktux kummuk. Hamũn, Topa yög tappet te: "Ûxohix 'ũm te Möyyex yög xat'ax xohix xexka mĩy hok, puxix Topa' kummugãp-tup 'üyãnãn tu', nüy nõ kummuk mĩy'ax hã pago." Kaxiy. <sup>11</sup>Yã tikmũ'ũn 'ohnãg te Möyyex yög xat'ax xohix mĩy, puyiy

Topa' kuxa kummuk tupmã, puyĩ' kuxa tu max. Pa Topa yõg tappet te: “Ûxohix' kuxa mãm ka'ok, puxix Topa' kuxa kummuk tupmã, puyĩ' kuxa tu max. Yã nõm xop kuxa hi xe'ëgnãg,” kaxiy. <sup>12</sup>Pa nõm nõy xop te Mõyyex yõg xat'ax mĩy putup, nõy yã kuxa kummuk tupmã Topa pu'. 'Ap putuk'ah nõm xop kuxa mãm ka'ok Topa kopah, puyiy Topa' kuxa tupmã. Yã yã hãpxopmã'ax hã' kuxa maxnãp-tup. Yã Topa yõg tappet te Mõyyex yõg xat'ax mĩy xop 'ãktux, hu: “Nõm 'üm te Topa yõg xat'ax xohix xexka mĩy xe'ëgnãg, puxi' kuxa hi!” Kaxiy.

<sup>13</sup>Topa te: “Yã' kummuk nõm te Mõyyex yõg xat'ax xohix xexka mĩy hok. Yã 'ãte nõm ha hãpkummu nõ gãp-tup, nõyhãpkummuk mĩy'ax hã pago.” Kaxiy. Pa Kunnix te hãpkummugã'ax hã' tot yümüg pupi', tu yümüg pupi' xok, yã tute yümüg mõy, 'üyiy yümüg hi xe'ëgnãg. Yã Topa yõg tappet te: “Yã' kummuk nõm te mĩpkupnix tu' xup.” Kaxiy. <sup>14</sup>Ha mõktu Kunnix te yümüg pupi' xok, 'üyiy yümüg hi xe'ëgnãg. Topa te' hok hã hãmaxnãhã, puyiy Yoneo hã' puknõg xop ha hãmaxnã. Yã hõmã Topa te 'Amanãm pu hãm'ãktux xex, tu hãmaxnã'ax hep xop xohix ha 'ãktux, tu hõnhã Yeyox Kunnix hã hãmaxnãhã, puyi' puknõg xop kuxa mãm ka'ok Yeyox Kunnix kopah. Hõmã Topa te hãm'ãktux xex, tu' xuktux, yã yümü'ã ha yã Koxuk nü'kutnãhã. Ha yümüg kuxa mãm ka'ok, yiy ta Topa Koxuk te yümüg kopa' xip.

### 'Ûxat'ax xix hãm'ãktux xex'ax

<sup>15</sup>Ûkxape xop, 'ãte xa hãmyümügãp-tup tu tikmũ'un mĩy'ax hã 'ãyümügãp-tup. Tik te' nõy pu hãm'ãktux xex, tu nõ kax'ãmi tappet tu'. 'Ok tikmũ'un te nõ hãm'ãktux xex koxyõy? 'Ãmhok. 'Ok tikmũ'ün te hãm'ãktux nõy kax'ãmi xehomi'? 'Ãmhok. <sup>16</sup>Hõmã Topa te 'Amanãm pu hãm'ãktux xex, xix 'Amanãm yã mõkputox pu hãm'ãktux xex. Yã mõkputox puxehnãg 'ãktux, 'ap xohix'ah. Yã Kunnix te 'Amanãm hã' mõkputox xe'!. Yã Topa te yã nõm kutnãhã'. <sup>17</sup>'Ûyümüg. Hõmã Topa te nõm pu hãm'ãktux xex, yã Topa te' pa'ax hittap mĩy tikmũ'ün mütik, ha ta' nõg hãmyãxatumuk xohix te' 430, 'ihã Topa te tikmũ'ün pu popmãhã Mõyyex yõg xat'ax. 'Ok Mõyyex yõg xat'ax te nõ hãm'ãktux xex koxyõy? 'Ok pa'ax koxyõy? 'Ãmhok. <sup>18</sup>'Ok Topa te hãmaxnãhã Mõyyex yõg xat'ax mĩy xop hah? 'Ok pe hãm'ãktux xex 'ükopa' kuxa mãm xop pu hãmaxnãhã'? Yã hãmaxnãhã! Pax pu Topa hãmaxnã Mõyyex yõg xat'ax mĩy xop hah, puxix hãm'ãktux xex xop kuxa mãm ka'ok xop ha hãmaxnã hok. Pa Topa te 'Amanãm pu hãm'ãktux xex, tu nõm ha hãmaxnãhã'.

<sup>19</sup>Teptu Topa te' xat'ax xohix xat? 'Ûxat, pu tikmũ'ün hãmyümüg, nõy yã yõg hãpkummuk mĩy'ax yümüg. Mõyyex yõg xat'ax pip ka'ok, tu mõktu' xupep 'Amanãm mõkputox, ha Topa te nõm pu hãm'ãktux xex, ha pexkox yõg nü'pok xop te tik pu Mõyyex yõg xat'ax xohix popmãhã', ha tik te tikmũ'ün pu nõm popmãhã'. Nõm tik te yã kote' xip. <sup>20</sup>Pa tik te yã kote' xip, puxix tu punethok. Pa Topa yãp-xet, 'ap punethok'ah. Topap-xet te hãm'ãktux xex.

### Texiy 'úxat'ax popmähä'

21 'Ok Möyyex yög xat'ax te Topa yög hām'áktux xex'ax nōā'? 'Āmhok! Pax pu Möyyex yög xat'ax tikmū'ün hīnnā', puxix tikmū'ün nōm xat'ax mīy, nūy yāy kuxa kummuk tupmā'. Pa 'āmhok, 'úxat'ax te' kuxa tupmā hok. 22 Pa Topa yög tappet te' kummuk 'áktux, tu tikmū'ün xohix xexka kummuk 'áktux, xi' puknōg xop xohix xexka kummuk 'áktux, hāpkummuk mīy hah. Topa yög tappet te nōm 'áktux, pu tu kuxa mām ka'ok, puyīy Topa hāmmaxnā'. Topa te nōm pu hām'áktux xex, tu' kuxa mām ka'ok xop pu hām'áktux xex, nōm xop kuxa mām ka'ok Yeyox Kunnix kopah.

23 Hamūn, yūmūg kuxa mām ka'ok nōmhā, pa hōmā Möyyex yög xat'ax te yūmūg kuxa hīy, kanet ka'ok kopa' hīy putuk, ha mōktu yūmūg kuxa mām ka'ok nōmhā. 24 Hamūn, Möyyex yög xat'ax te yūmūg hāmyūmmūgāhā', nūy yūmūg mōgā', ha mōktu' xupep Yeyox Kunnix, pu tu yūmūg kuxa mām ka'ok Yeyox Kunnix kopah, puxix Topa yūmūg kuxa kummuk tupmā', 'üyīy kuxa tu max. 25 Hu nōmhā yūmūg kuxa mām ka'ok, ha Topa yög xat'ax te yūmū'ā hāmyūmmūgāhā', ha' kux.

26 'Āxop xohix kuxa mām ka'ok Yeyox Kunnix kopah, hu ta 'āxop yā Topak-tok xop, yā 'ākuxap-xet Yeyox Kunnix kuxa mūtik. 27 Yā 'āxohix mōxaha Kunnix yög xop kopah, ha 'āp-tox pix, yā 'ākuxa mām Kunnix kopah, tu nōmhā Kunnix putuk, yā Kunnix xip 'āxohix kopah. 28 Yā Topa te yūmūg xohix hā tehe', ha' yāy putuk 'ūkuxa mām ka'ok xop, yā Yoneo xop xi' puknōg xop te yāy putuk. Yā nōm te' hok hā' hām, xix nōm te tayūmak hā' hām, tu yāy putuk. Yā tik xix 'ün te yāy putuk. Yā xohix te' nōy putuk, yā' xohix kuxa mām ka'ok Yeyox Kunnix kopah. 'Ap pip'ah 'üxexka xop xik-tōgnāg xop. Yā yāp-xet, 'ūkuxap-xet, tu yāy putuk. 29 Yā 'āxop mōxakux Kunnix yög xop kopah, hu ta kama 'Amanām hā 'āmōkputox, ha Topa te xa hāmmaxnāp-tup kamah, yā tute hām'áktux xex 'Amanām mōkputox pu'.

**4** 1 'Üyūmmūg. 'Útak 'üm yög hāpxop xohix, tu' xok putup, hak-hāy tuk-tok te' pop putup, 'üyōg 'ātak yög hāpxop pop putup. Pa' xip 'ātak, hak-tok 'ühok, yā' hok hā' hām yāy tak pu'. 'Üyōg 'ātak te' popmā'ax hāpxop, yāk-tok yög hāpxop, tu' pop putup, pa hōnhā' pop'ah. Yā hōnhā hāmhōgnāg 'ük-tok. 2 Ha ta' xuxyā te nōm kutok xat, nūy tu pēnā max, ha ta' xuxyā nōy te hāpxop pēnānā' xip, nōm hāpxop 'ātak tek-tok pu' popmā'ax, yā nōm tek-tok pēnāhā', tu hāpxop pēnāhā', tu mōktu nōm 'āmnīy 'üm mō'nāhā', yā tik yög 'ātak te nōm 'āmnīy 'áktux tap. 3 Hā kaxīy yūmūg mūn hōmā kamah. Yā yūmū'āte nōm kutok putuk, ha yāmīy kummuk xop te yūmūg xat kummuk, ha nōm xop pu yūmū'āte' hok hā' hāpxopmāhā' yāmīy xop pu', xix Topa hā' puknōg xop pu yūmū'āte hāpxopmāhā'. 4 Pa hāpxip 'ihā nōm hāptup mō'nāhā', 'ihā Topa te yāy kutok pit nū'kutnāhā', ha' tut te' put, yā Yoneo xop kopa' xip Topak-tok, ha ta Möyyex yög xat'ax xohix xexka pu' yīpkox xip Topak-tok, nūnte hām xexka tu' xip 'ihā'. 5 Topak-tok nūn, nūy nōkōpanat yūmūg xohix, puyīy Möyyex yög xat'ax yūmūg xat hok, tu' nūn, nūy yūmūg kuxa hīnnā xe'ēgnāg, 'üyīy yūmūg xohix yāyhā Topak-tok xop.

<sup>6</sup>Yā 'āxop yā Topak-tok xop, yīy ta Topa te nū'kutnāhā yāy Koxuk 'ākuxa hah, ha Topa Koxuk te Topa pu: "Ātak, yōgnū 'ātak!" Kaxīy. <sup>7</sup>Hamūn, yā hōnhā' kux, 'āxop te 'a hok hā 'āhām'ah, pa nōmhā 'āxop yā Topak-tok, ha Topa te xa' popmāp-tup yāy yōg hāpxop, yā yāy kutok pu nōm popmāp-tup.

### Paot kuxānōg. 'Ok Ganax yōg xop kuxa mām kux?

<sup>8</sup>Pāyā hōmā 'āxop te Topa hā 'āpuknōg, ha ta topa komut xop te 'āxop xat pax, tu yā mō'āmā'. <sup>9</sup>Pa nōmhā 'āxop te Topa yūmmūg, yā Topa te 'āxop yūmmūg hāmāxap, hak-nāy tu 'āxop te Topa yūmmūg. Texīy tu putpu 'āxop mōg, nūy Topa hā' puknōg xop yōg hāpxopmā'ax tat 'ūxeheh? Nōm hāpxopmā'ax te 'āxop hā te 'ohnāg. Yā 'ākummugā'ax 'ūxeheh. <sup>10</sup>Yā 'āxat, xa nit xān 'ihā 'āhām hok, tu 'āmuk xexka mīy'ax xat, xix māyōnhex tup'ax yōg 'āmuk xat, xix mō'āgmū'ax yōg, xix hāmyāxatamuk yōg. <sup>11</sup>Ūgkuxānōg. 'Ok hitop hāg hām 'ūgmūn 'āxop kopah? 'Ok 'ākuxa mām kux, nūy nō xat'ax hittap mīy?

<sup>12</sup>Ūkxape xop, 'āpu yōg hāpxopmā'ax tat. Yā 'āxop hāgxape, yāg kummugā 'ohnāg. <sup>13</sup>Xatek yūmmūg, hōmā 'ūkpakut, 'ihā noxk xip 'āxop mūtik, hu 'āte Topa yōg hām'āpak max'ax 'āktux hāmāxap 'āxop pu'. <sup>14</sup>Ūkpakut xexka', pa 'āxop tek putup pax, tuk mūn tu yāyhāhup 'ohnāg, tuk kuxa ka', tu 'āhāk tehe', tuk hā' tot, yā pexkox nū'pok xop putuk, yā Yeyox Kunnix putuk, <sup>15</sup>ha 'āxop tek mūn hā 'āhittup xexka'! Hamūn, hōmā 'āxop tek mūn hā 'āhittup xexka', pa hōmhā 'āmhōk. Texīy? <sup>16</sup>'Ok 'āte xa hāpxe'e 'āktux, hu yāyhā 'āxop hāk puknōg? Pa tīy! 'Ok 'āhāg puknōg nōmhā?

<sup>17</sup>Yā nōm xop te 'āp-tup pax 'āktux, nūy 'āxop mōgā, pāyā yōg putat ka'ax kummuk, tu yūmūg yāy xatat putup, 'āxop xik mūn, xayīy nōm pe 'āmōg. <sup>18</sup>Ta' max, pu nōm xop 'āp-tup pax. Tikmū'ūn te' nōy putup pax, tu hāpxopmā max, 'ihā 'āxop mūtik xip, 'āxop mūtik xip hok kamah. 'Āte xa hāpxe'e 'āktux. <sup>19</sup>Ūgkutok xop, 'ūgkuxa xūy, yā' tut tek-tok put xūy putuk. Hā kaxīy 'āte 'āxop hāg kuxa xūy, ha mōktu 'āxop yāyhā Kunnix putuk. <sup>20</sup>Ātep-tup, nūy noxk xip 'āxop mūtik nōmhā, nūy 'ōg hāmpē tu panōm hā' nōy yānān. 'Ūgkuxānōg. 'A 'āxop yōg hāpxopmā'ax max'ah.

### Tu 'Agah xix Xat 'āktux

<sup>21</sup>Āpu, 'ā hām'āktux! 'Āxop tep-tup, nūy Moyyex yōg xat'ax mīy, nūy yāy kuxa tupmā Topa pu! Moyyex yōg xat'ax tep-tep 'āktux? <sup>22</sup>Ūxuktux kaxīy: Yā mōnāyxop 'Amanām kutok 2. 'Ūk-tok puxet mūg tut yā' hok hā' hām, yā' nōy te' xat, ha' hok hā' hām, yā' puknōg. Pak-tok nōy mūg tut yā 'ūn xe'ēgnāg, 'ap hok hā' hām'ah, pāyā kāmānat xat. <sup>23</sup>Ha 'Ūn yā' hok hā' hām, tuk-tok pit put, yā kaxīy 'ūn xohix tek-tok put. Pa 'ūn nōy yā' nōy xat, tuk-tok pit put, ha hāmhūmnāg 'ūnā'ax, ha Topa te hām'āktux xex, tu kaxxop putnāhā'. <sup>24</sup>Hamūn te yūmū'ā hāmyūmmūgāhā' hāpxopmā'ax nōy. 'Ūn 2 te hāpxopmā'ax yūmmūgāhā', Topa te' pa'ax mīy tikmū'ūn mūtik. 'Ūn puxet yā' hok hām. Yā' xuxet'ax 'Agah, ha 'ūn nōy te 'Agah xat. Hā kaxīy Topa te tikmū'ūn xat, tu' xat'ax xohix popmāhā yīktix Xīnāy



tu', hã kaxiy 'Ágah hã' mőkputox, yã' hok hã' hãm, tu' yãy xat 'ohnãg. <sup>25</sup>Yiktix Xinãy xip 'Anap tu', tu' yög tikmũ'ün yã' hok hã' hãm, xix kômên Yenoyanên yög tikmũ'ün yã' hok hã' hãm. Nôm xop te 'Agah mőkputox putuk. <sup>26</sup>Ha ta' xip kômên Yenoyanân nøy, tu pepi' xup pexkox tu'. Nôm yög tikmũ'un te yãy xat, 'ap hok hã' hãm'ah, nôm kômên yũmũ'ã hã' tut xe'e'. <sup>27</sup>Yiy Topa yög tappet te:

“Áhittup, xate 'ãk-tok put xet'ah,

Áhittup 'ãk-tok put tu 'ãxũy 'ohnãg.

Yã tik te' xetut nĩm, hak-tok xohix punethok.

Ha tik te' xetut mũtik nôm, hak-tok kutõgnãg.” Kaxiy.

<sup>28</sup>Hõmã Topa te hãm'ãktux xex 'Amanãm pu', yĩ' xetut Xat tek-tok 'Iyak put. 'Úkxape xop, hã kaxiy yũmũg yãyhã Topak-tok xop, Topa te hãm'ãktux xex hah. <sup>29</sup>Yã hõmã 'Amanãm kutok puxet, pa Topa te nôm hãmãxap hã hãm'ãktux xex 'ohnãg. Ha tak-nãy tu' nøy put, ha Topa Koxuk te nôm hã hãm'ãktux xex, hak-tok te mãxap te' taknøy tek-te'ex kummuk. Yã hã kaxiy hõnhã kamah. <sup>30</sup>Putep xuktux Topa yög tappet? Yã hãm'ãktux, hu: “Ápu' xat pu mөг, 'ün te' hok hã' hãm, xik-tok. Hãmũn, yã 'atak te yãy yög hãpxop popmãp-tup'ah nôm 'ün kutok pu', pãyãk-tok nøy pu' popmãp-tup, tu yãy xetut xe'ek-tok pu' popmãp-tup.” Kaxiy. <sup>31</sup>Yiy ta 'úkxape xop, yũmũg mũn yã' xetut xe'e hãk kutok xop, nôm te' nøy xat. 'Ap 'ün nøy hã yũmũg kutok 'ohnãg, nôm te' hok hã' hãm. 'Ámhok.

### Tute' xat'ax 'ãktux, xi' hi xe'ẽgnãg 'ãktux

**5** <sup>1</sup>Yã Kunnix te yũmũg kuxa hĩnnã tap, 'ũyiy hi xe'ẽgnãg. Hõmã Yoneo xop yög xat'ax te yũmũg xat, ha yũmũg kuxa hĩy, pa Kunnix te yũmũg mөг, ha yũmũg mөг. 'Ápu nox pi', puyiy' xat'ax 'akuxa hĩy hok 'úxeheh, ka' hok hã 'ãhãm 'úxeheh.

<sup>2</sup>Ápu 'ũg-ãpax, 'ũgmũn Paot, tu 'ãxop pu hãm'ãktux: 'Áxop te hitop yãy xax mep 'ũyĩmap, nũy yãy kuxa kummuk tupmã Topa pu'. 'Ok Kunnix te hitop tu' xok 'ãxop pupi'? <sup>3</sup>Áte xe hãm'ãktux, tik 'ũm te yãy xax mep 'ũyĩmap, puxi' max, pu tu mĩy Mõyyex yög xat'ax xohix xexka', 'ap xahix'ah. Topa te' xuktux. <sup>4</sup>Nôm 'ũm tep-tup, nũy Mõyyex yög xat'ax mĩy, puyiy Topa tikmũ'ün kuxa kummuk tupmã', puyi' kuxa tu max, puxix Topa nôm 'ũm hã hãmmaxnã 'ohnãg, ha' kuxa tupmã 'ohnãg. 'A Kunnix yög'ah. <sup>5</sup>Pa yũmũg kuxa mãm ka'ok, hu yũmũ'ãte hãmmax hip, pu Topa yũmũg kuxa kummuk tupmã' yã Topa te yũmũ yög hãpkummuk mĩy'ax xaxogãhã', ha' kux. Yã yũmũ'ãte hãmmax hip, 'ihã yũmũg kuxa mãm ka'ok, yiy Topa Koxuk te yũmũg ka'ogãhã'. <sup>6</sup>Yũmũ'ãte yãy xax mep 'ũyĩmap, pe' yãy xax mep 'ũyĩmap hok, yã' yãy putuk Topa pu', pa Topa tep-tup, yũmũg kuxa mãm ka'ok, hu yũmũ'ãtek nøy putup pax nõmhã'.

<sup>7</sup>Hõmã 'ãxop mөг putat max hã, tu 'ãyĩpkox pip, hu hãm'ãpak max'ax xe'e 'ãpak. Pa nõmhã 'ãmhok. Putep te 'ãxop mөгãhã', pu nõm putat xak? <sup>8</sup>'A Topa'ah yã Topa te yãy ha 'ãxop xãnãhã'. <sup>9</sup>Ápu hãmũmmũg. Tikmũ'ün te: “Úxip hãmãxap pãm tokatogã'ax kutõgnãg, pa hãpxip 'ihã nõm pãm xexka',” kaxiy. Hã kaxiy hãpkummuk te' xexka nøy nã' mөг. <sup>10</sup>Úgkuxa yũm ka'ok



Topa kopah, tu hāmyūmmūg, 'a 'āxop te hāmpel'āpaxex nōy putup'ah, pak mūn putuk hāmpel'āpaxex. 'Ūgkuxa yūm ka'ok Topa kopah, tu hāmyūmmūg, Topa te nōm tik kummuk xūygāp-tup, nōm te 'āxop mōgāhā hato'a'.

<sup>11</sup> 'Ūkxape xop, putep hāmpel'āpaxex? 'Ok 'āte hām'āktux, pu tikmū'ūn Topa yōg xat'ax mīy, nūy yāy kuxa kummuk tupmā'? 'Āmhok. 'A 'āte' xuktux'ah. 'Ok tikmū'ūn tek kummugāhā'? Hamūn. 'Ok tikmū'ūn te Yeyox yōg xok'ax 'āpak, tu' xok mīpkupnix tu xupak, tu' gāy hok? 'Āmhok. Yā' gāy tikmū'ūn!

<sup>12</sup> Nōm te 'āxop kummugāhā', yā 'ātep-tup, pu nōm yāy mep xexka'!

<sup>13</sup> Hamūn. 'Ūkxape xop, Topa te yāy ha 'āxop xānāhā'. Tutep-tup'ah pu' xat'ax 'āxop xat pax nām. Pa Topa te 'āxop mōy, xa mōg. Pa nōmhā yāy putup'ax mīy hok, 'ākuxa te nōm kummuk tep-tup, pa 'āpu 'ānōy putup pax, nūy ta 'ānōy ha hāmmaxnā'. <sup>14</sup> Yā mōyyex yōg xat'ax xohix te hāpxopmā'ax puxet 'āktux, hu: "Āpu 'ānōy putup pax, yā yāy putup pax putuk," kaxīy.

<sup>15</sup> Pa 'āxop yāy mānōg, xix yāy kix, puxix xokxop putuk, yā yāy māhā'.

### Topa Koxuk xix tikmū'ūn yōg putup'ax

<sup>16</sup> Pa 'āte xa hām'āktux, 'āpu Topa Koxuk pu 'āyīpkox pip, nūy yāy yōg putup'ax mīy hok. <sup>17</sup> Yā tikmū'ūn te yāy yōg putup'ax mīy, puxix Topa Koxuk pu' yīpkox hok, ha Topa Koxuk pu' yīpkox pip, puxix yāy yōg putup'ax mīy hok. Yā Topa Koxuk te yūmūg yāy yōg putup'ax hā' puknōg, ha yūmūg yāy putup'ax te Topa Koxuk hā' puknōg. 'Ap yāy putuk 'ohnāg, yīy Topa Koxuk puxet pu 'āyīpkox pip. <sup>18</sup> Ha Topa Koxuk te 'āmōgā', puxix Mōyyex yōg xat'ax 'āxat pax hok.

<sup>19</sup> Yūmū'āte yāy putup'ax mīy. puxix tikmū'ūn yūmū yōg hāpxopmā'ax pēnā'. Yā yūmū'ātek nōy hāk xupxet pax, tu 'ūn xop pēnā kummuk, tu tik xop pēnā kummuk, tu kokex putuk, tu yūmū'āte hā kaxīy putup pax hāpxopmā'ax xut putux, <sup>20</sup> tu topa komut xop pu nūktettex, tu mīm mīy, tu yūmūg yāy putup nōg, tu yāy kute'ex kummuk, tu yāy tup-tup hāpxop xohix, tu yūmūg gāy, tu yūmūg xupkūmīy, tu yūmūg yāy tuk-mīy, tu yūmū'āte tikmū'ūn xohix nīm, nūy yāgnāg mōgā', <sup>21</sup> tu yūmū'āte yīpkūmīy, tu yūmūg paptux, tu yūmūg yāy hi pax, nūy hāpkute'ex pax. Nōm te yāy putup'ax mīy xop texīy mīy. Hōmā 'āte xa hām'āktux, tu hōnhā xe' xuktux. Tikmū'ūn te' mīy nō'ōm, 'a' mō'nāp-tup'ah Topa yōg xop kopah, yā Topa te nōm xat xop kopa' xip, pāyā hāpkummuk mīy xop xat 'ohnāg.

<sup>22</sup> Pa Topa Koxuk xip yūmūg kuxa kopah, puxi' pip hāpxopmā max xohix yūmūg kopah. Yā mīnta ta putuk yūmūg kopah. Yūmū'ātek nōy putup pax, tu yūmūg kuxa hittup pax, tu yūmūg kuxa mām, tu yūmū'āte hāmmax hip, tu yūmūg gāy 'ohnāg, tuk nōy ha hāmmaxnāhā', tu' nōy tu yūmūg pip ka'ok, <sup>23</sup> tu hāpkummuk yānān 'ohnāg, tu yāy putup'ax mīy 'ohnāg. 'Ūmīy nōm hāpxopmā max, puxix Mōyyex yōg xat'ax hitop tu yūmūg xat. <sup>24</sup> Ha Yeyox Kunnix yōg xop xohix te yāy putup'ax mīy kux. Yeyox Kunnix xok mīpkupnix tu', puyīy yūmū yōg putup'ax kummuk kux. <sup>25</sup> Topa Koxuk te yūmūg kuxa hīnnāhā', nūy yūmūg mōgā', 'ūyīy hāpxopmā max xohix. 'Āpu nōm pu 'āyīpkox pi'. <sup>26</sup> Āpu yūmūg yāy xexka pek paxex hok, tuk nōy kute'ex kummuk hok, tuknōy tu yīpkumīy hok.

## 'Āpu 'ānōy pupi hāpxop putux tat

**6** <sup>1</sup>Ūkxape xop: 'ūxip tikmū'ūn 'ūm, tu hāpkummuk mīy. Ha ta nōy 'ūm xip 'āxop kopah, nōm te Topa Koxuk pu' yīpkox xip pax. Yā' max, nōm te Topa Koxuk 'āpak pax te' nōy putpu' nūnnā putat max tu', tu' nōy te hāpkummuk mīy nūnnā putpu'. Pūyā' gāy hok, Topa Koxuk te nōm xat hah. Pūyā tu yāy kutōgnāg pe'paxeh. Yā paxip, nūy hāpkummuk mīy hok kamah <sup>2</sup>'Āpu 'ānōy yōg hāpxop putux tat, yā 'ānōy yōg hāpkummuk hā' tat. Hā kaxīy xate Kunnix yōg xat'ax mīy. <sup>3</sup>Tik 'ūm te yāy xexka pe'paxex, pāyāk-tōgnāg. Tute' yāy pu' koit. <sup>4</sup>'Āpu yāy yōg hāpxopmā'ax kopit, 'ānōy yōg hāpxopmā'ax kopit hok pa 'ōgnū 'ūp-xet. 'Ānōy yōg hāpxopmā'ax 'āktux kummuk hok, pāyā' yōg max. Hā kaxīy tu xate yāy yōg kopit, tu yāy pēnāp-tup max, 'īhā 'ānōy yōg hāpxopmā'ax kopit 'onhāg. <sup>5</sup>Hamūn, 'ūxohix te yāy yōg hāpxop putux tat putup, yā yāy yōg hāpkummuk hā' tot putup.

<sup>6</sup>Tik 'ūm te 'āyūmmūgāhā Topa yōg tappet. 'Āpu nū mūtīk yāy pu' pot 'ōg hāpxop max xohix. <sup>7</sup>'Āpu hāmpē'āpaxeh hitop hok, yā Topa kuxa yūm 'ohnāg koit'ax kopah. Tik te hāpxopxap xok tu nōm hā' ta mōy putup, 'ap ta nōy'ah. <sup>8</sup>Tikmū'ūn te pēyōg xap xok hām tu', puxix pēyōg ta nūnnāp-tup yāy pet hah. Hā kaxīy tikmū'ūn te yāy putup'ax mīy, puxix hāpkummuk hā' yānān, ha tikmū'ūn te Topa Koxuk pu' yīpkox xip, tu hāpxopmā max, puxix tu' hi xe'ēgnāg mō'kuma' mōg, ha' kux 'ohnāg. <sup>9</sup>'Āpu yūmūg hāpxopmā max, yā tuknōg hok. Yūmūg hup hok, kopxix hāpxip 'īhā hāmmaxnāp-tup, yāy ha hāmmaxnāp-tup. <sup>10</sup>Hu 'āpu yūmūg hāpxopmā max mō'kumak mōg tikmū'ūn xohix pu', tu' xape xop pu hāpxopmā max xe'ēgnāg, yā' kuxa mām xop xape xop pu'.

## 'Ūkux'ax

<sup>11</sup>Ta hēnā', 'āte xa kax'āmi xexka', yā 'ūgyīm hā kax'āmi xexka'. <sup>12</sup>Nōm tik tep-tup, pu tikmū'ūn nōm 'āktux max. Nōm tik tep-tup nūy 'āxop mōgā', nūy 'āxop xat, xayīy 'āxax mep 'ūyīmap. Texīy? 'Ap nōm xop te Kunnix xok'ax 'āktux putup'ah. Yā mīpkupnix tu' xok, pāyā nōm xop te' xaxok, puyīy tikmū'ūn nōm kute'ex kummuk hok. <sup>13</sup>Hamūn, nōm te yāy xax mep 'ūyīmap, pa nōm te Mōyyex yōg xat'ax xohix mīy 'ohnāg, pa nōm te 'āp-tup, nūy 'āxat, xayīy 'āxop yāy xax mep 'ūyīmap. Texīy? Nōm tik tep-tup, nūy yāy 'āktux xexka', 'ūxohix te yāy xax mep 'ūyīmap hah. <sup>14</sup>Pak mūn 'a yāy xexka 'āktux putup'ah, pa 'āte yūmūg Yeyox Kunnix 'āktux putup ha' xok mīpkupnix tu', yūmūg pupi' xok. Yā Kunnix tek pupi' xok, 'ūyīy hām xexka yōg hāpxop xohix xak hok, puyīy Kunnix puxet tuk kuxa hi nōmhā, 'āte nōm pu hāpxopmā'. <sup>15</sup>Pe yāy xax mep 'ūyīmap, pe yāy xax mep 'ūyīmap hok, yā hāpxopmā'ax kutōgnāg. Pa Topa te yūmūg kuxa tupmāhā', yūmūg kuxa tu max, 'ūyīy hāpxopmā max xexka'. <sup>16</sup>'Āpu 'āyīpkox pi', xayīy Topa yōg putup'ax mīy. Pūyā Topa 'ākuxa māmā', xix 'ākuxa ka', xayīy Topa hā yāy yōg tikmū'ūn xe'le'.

<sup>17</sup>Nõmhã puxi'. 'Āpu tikmũ'ũn 'ũxek kummugã hok. Yã hamũn. hõmã tikmũ'ũn tek kummugãhã', yĩy kayax pip yõgnũ', yã Yeyos puk hok hãk hãm.

<sup>18</sup>'Ūxape xop, pũyã yũmũg xuxyã Yeyox Kunnix xa hãmmaxnã mõ'kuma' mõg. Hamũn.

Tu ta kux.